







Die Weltt

sagtsy sehe kain besse-
rung von den / die sy
Lutherisch nen-
net wzbesserüg
sey / ein wenig
hierinn be-
griffen.

Hans greiffenberger

Im Jar. M D XXIII.



Abt. 43



Allen vnd jeglichen glaubigen in

Christo wünsch ich Hanns greyffenberger
die gnad gottes vnd merung
Christenliches glaubens.

Brueder in Christo / Es begibt sich
offt das man sagt / man sehe niemant der sich besser di-
ser zeit / in welcher das wort gotes so in vollem schwäc-
ket / Darauff ich fürgenomen hab mit der gnad Cristi
meines gottes ein wenig vnderricht zugeben / was die
recht warhafft besserung eins menschen sey / der widerüb
geporen wirt auß dem gaisst der warhait / wie Christus
sagt Johannis am. iij.

Es ward Christus gefragt Luce am. xvij. wann das
reich gottes kam / Sagt er zu ihm / Dz reich gotes kompt
nit mit außern berden / Man wirt nit sagen / Siehe hie
oder dort ist es / Sonnder das reich gottes ist inwendig
in euch. ꝛc.

Darum ist die besserung des menschen nit also gethon
das man sy offentlich sehe / Sondern es ist ein solch ding / dz
es ganz heimlich vñ still züget / vnd ist ein solch besserung
das sy niemant ee erfert den die Liechtelmacherin / Göt-
zenschiger / vñ meßtramer / die Brüderschafften werdes
auch gewar / Dan dz ist eben die recht warhafft besserung
des menschen / so in Got erlöset von seinem güt bedückē
vñ eigener gerechtigkeit / die er thut auß dē falsche liecht
der vernunft vñ aigen willen / diese besserung werde we-
nig menschen gewar / dan die welt wirt jr nit gewar wen
sy kompt on mittel / durch den gaisst der warhait / welch
en die welt nit erkennet / dan sy sieht in nit / Johan. am
viii. vñ Paulus sagt in der ersten zu den Cor. am. iij. ca.
Der natürlich mensch (on gotes gaisst) versteet oder ver

nympt nit/der ding die des gaist gottes sind / Sunder
es ist im eynthorhait/so man im daruon sagt. Es ist
auch gewis vnd felt nit/ das sy dise menschen veruolgt
vnd verspot werden von allen gleyßnern vnd werck
hailigen/dan die selbigen sagen yetz/ O ho es ist yetz ein
seltsams ding/ man darff nit mer betten vnd in kirchē
geen/vnd darff nit mer fasten / man hatt genug am
glauben/man darff gar nichts güttes mer thun / Ich
will gern sehen was darauß will werden ꝛ. Got erbar
me sich diser menschen / sy seind nit zu schelten/sunder
zu erbarmen/wen sy eyner fragt was gutt sey/ so sagē
sy wild strobuzen / vnd nit anders dan was sy gut ge-
dunckt/Wie wir bissher layder alle gehon haben/dar-
umb kannyemant yetz von kainer besserung sagen/dan
in dem sy geschicht/der selbig streytt nit seer von seyner
frümkait/sunder erkent sich den aller ellendisten men-
schen/so er seyn mag/vnd hat warlich wol zu bytten/
darff nit mer zellen/darff auch nit vil liechtley n auf ste-
cken/er hat ain ander liecht das erleucht im seingewis-
sen/dz er sich nit würdig gedunckt am tag zu wandern/
er laßt auch kain busaunen vor im blasen / so er seyn
lieb erzaigt gegen seinem nechsten/ Wie wol Christus
sagt Mathei am v. Laßt ewer liecht leuchten vor dem
menschen/das sy sehen ewere gütte werck/ vñ got prey-
sen/ So thunt sy nichts das sy gesehen wöllen werden
Geschicht es dan/dz sy gerügt oder lautmer werden vñ
den/den sy brüderliche liebe erzaigt haben/ so wöllen
sy doch nur dz Got gepreyset werde/ dan sy wissen/Dz
nit ire (sunder gotes) werck sind/Wie sollen sy sich dan
vast sprengen hin vnd her/wie die gleyßner thun/die ha-
ben zu zeyten ein viertel stund liechtlein an zu zünden/
eyn yetzlichen gözen eyns/das er ja gesehe das er nit
über den altar ab vñ eyn loch in kopff fall/der lieb hai-
lig(er were mir auch lieb im ofen) Darumb schreyt ofe

ainer vnd waist selb nit was.

Darum lieben brüder laßt vns got bytten/das inen
Got auch zaige die besserung/dan es ist nit ein solch besse-
rung/wie des bapsts hauff gelert hat/darvor vns Cristus
gewarnet hat. Mat. am. xxviii. Sprechende. Es werden
auff ersteen falsch christen/vn falsch leerer/vnd sagen/
Ich bin Christus/dz ist/ich hab die sünd zu verget ich
wz ich dich haiß/so kumbst gen himel. Vn mer/sy werd
en sagñ hie oder dort ist Cristus/So glaubt es nit (geet
nit hin in zesüchē) O got wie fleissig hat er vns gewar-
net/aber wir haben frembd stim gehört/darumb seind
wir jr gāgen/Darauff sag ich/dz niemater kēnen kan/
die warhafft vn recht besserung dan d mensch in dem sy
geschicht/man kan sy auch mit nicht den menschen lern
sond gotes gaist muß thun/es ist nit ein solch besserung
wie wir gemaint habñ/wan einer vō einē rohen leben d
jugēt felt auf ein gleißnerisch lebñ/als die gethon habñ
die auß vnwissenheit gotes/seind in die klöster gelauff-
en/vn in die kutten geschlossen/vn jr hail darin gesücht
haben/wie ich dan selbs gehört hab vō einē alten gleiß-
nerischen barfüßer/der prediget lāg wz also geschehen
war durch dē glaubñ/vn zu lest sagt er. Ja solt ich got
nit vertrauen dz er mich im kloster stād selig macht/vn
solt so hart ligen auf einē stro sack/vn in der kutte steckñ
dz wer übel/also bochte der ellend mēsch auff seinē stro-
sack vnd kutten/dan laider er erkant Cristu nit/vn des
gab er ein ellende gleichniß/daran mā spiret seinē glau-
ben/Vnd sagt/wan einer einem kaufmā saget/er solt
auff dise meß ziehen/so wurd er hundert gulden löfen
thet ers nit/wer ein zaichen das er den rechten glauben
nit het oder habe.

Also sehet jr lieben brüder/was dise leut erlangen/
mit jrer besserung in kutten. Helffenen got das wünsch
ich inen (ist es anders sein götlicher will.)

Darum ist ain Cristliche geystliche besserung vil ain anders
dann wie die vernunft für gibt / die maynt / wen sy nur
ain selzam klayd an leg / vn̄ assz vnd trinck nit wie an-
der menschen / So sagenn sy / Ich bin im geystlichen
standt / Ach Gott der blindheit / eyn rechter Christ
fleucht solliche ding selber / man darff ims nit gebyettē
das er sich nit fülle mit guttem geschleck vnd tranck /
Sunder er wayst vnd hat grosse acht darauff / das er
kayn grössern seynd hat / dan sein schelm den altē Adā
Darumb wirt ain rechter Christ nit seer erschreckenn /
wan / man im vom todt sagt / darvon wissendie hailigē
küsser nichts / Sunder sy rüffenn sie all an / das sie nur
nicht leyden dürffen / gebeneinem ein aychen fuß / dem
andern ein wächsine nasen / dē dritē eyn wächs in maul-
korb / sollicher gütter werck steckē sy voll / vn̄ die solchs
nit thun / die seynd Lutherisch / sagen sy / Wen man sy
fragt / w̄ ist Lutherisch / so geen sy hin vnd winden dye
helß wie die Gens auff dem myst / vnd verschmacht yn
übel / das manß nit loben will / vnd den Christen jr gack
elwerck nit gefelt / wiewol jr vil seind die dyser gaudle-
rey aller abgestanden sein / nit dassy es für güte halten
sonder haben vorhin k̄ain lust darzū gehabt / Vnd so
sy es gepraucht haben / haben sy es nur gethon den mē-
schen zū gesicht / haben auch Christlich gescholten welle
werden / Dise vermainen yetz sy seyn güte Christen / sye
sauffen / fressen vnd büßē aber gleich als vor / dz ist kein
besserung / vnd seind erger dan vor / vrsach sy verachten
vnd spotten aller der die noch nit ledig seind / mit densy
sollen ein mit leyden haben. Der ist auch nit gebessert / d̄
ein handel hat oder ein handwerck / damit sein nechster
betrogen oder vereergert wirt / vnd nit darvon laßt /
wie etlich thun / als bildschnitzer / Maler vnd Formsch-
neider. ꝛc. Sy sagen sy / gelten die hailigen nicht / so will

ich hüren vnd büben machen/ ob die gelt gulden/ daz ist
falsch vnd vnd vnchristlich/ sollich leutt machen/ dz mā
das wort gottes verlestert vnd verspot/ vnd man sage
schaw das thünd die Euangelischen/ vnd der gleychen
Aber nit also/ man muß es anders versteen/ Es ist ya
kein besserung da/ Aber wa ein warhaffte besserung
geschicht/ fleyßt man sich zūmeyden alles des/ das dem
wort gottes wider ist/ vnd fleißt sich zūthün was got ge
fellig ist.

¶ Darumb sol ein yeglich Christen mensch sich tag vñ
nacht üben im gesatz vnd wort gottes/ Wiewol ettlych
gelert sagen/ der gemain man soll nit mit der geschriffte
vmbgeen/ wañ es zimpt sich nit/ das ein Schuster das
Euangelion lesß/ oder mit feder vnd tindten vmb gee/
sonder mitt leder vnd schwert. zc. So sag ich dar auff/
Ich hab nie kein Esel gehört singen/ als ein Nachtri
gal/ es seind leutt von zeruytten sinnen/ vnttüchtig zūm
glauben/ die sollich sagen/ blodern wissen nit was.

¶ Lieben brüder in Christo laßt vns got anruffen (im
gaist vnd in der warhait) das er vns mittail sein krafft
an vnserer erlöfung/ das wir die frölich leiden nach go
tes willen. Amen.

Faint, illegible text, likely bleed-through from the reverse side of the page. The text is arranged in several lines, but the characters are too light and faded to be transcribed accurately. Some faint words like "und", "der", "von", "zu", "in", "aus", "mit", "ohne", "gegen", "für", "auf", "unter", "über", "zwischen", "hinter", "vor", "hinter", "gegen", "für", "auf", "unter", "über", "zwischen", "hinter", "vor" are visible.

Fg 3022

ULB Halle 3
003 005 81X



5b.





